



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIAL

Komunikadu Imprensa

Periodu Outubru 2010

Edisaun, 22 Outubru 2010

JSMP Marka Audensia ho Prezidente da Repúblika

Iha loron 22 fulan Outubru 2010, JSMP hetan oportunidade atu marka audensia ho Sua Exelensia Prezidente da Repúblika Timor Leste, Dr, José Ramos Horta. Audensia ne'e halao iha Palasiu Presidencial, rua de Prezidente Nicolau Lobato-Aitarak Laran iha oras tk 2.30 OTL. Marka Prezensa iha audensia ne'e husi equipa JSMP nian hamutuk ho ema nain 6 no husi Presidencial nian aleinde Sua Exelensia Prezidente da Repúblika rasik, marka mos prezensa Xefe Gabinete Prezidente nia hamutuk ho staff nain ida tan.

Maske dalabarak liu JSMP iha opiniaun no pozisaun ne'ebé diferente ho Prezidente da Repúblika, maibe Prezidente da Repúblika nu'udar orgaun soberania ne'ebé kaer papel mais importante atu asegura funcionamentu instituisaun demokratiku sira tuir saida mak konsagra iha Artigu 74 Konstituisaun da Repúblika. Tanbá ne'e importante teb-tebes ba JSMP atu hakbesik Prezidente atu koalia ba malu no apresenta direktamente pozisaun JSMP nian kona-ba kestaun sira hanesan ne'e, haktuir Luis de Oliveira, Direitur JSMP.

Audensia ne'e mai husi iniciativa JSMP nian, ne'ebé buka atu hakbesik an ba Presiden hodi apresenta hanoin ruma husi JSMP kona-ba asuntu sira ne'ebé relasaun ho kompetensia Prezidente da Repúblika konaba qesatun indultu ne'ebé dalabarak liu kria konfuzsaun ba publiku no asuntu seluk ne'ebé relaciona ho dezemvolvimentu setor Justisa Timor Leste nian.

Iha oportunidade ne'e JSMP apresenta mos submisaun JSMP nian kona-ba Indultu ne'ebé antes ne'e apresenta ona ba Ministériu de Justisa*.

Depois de rona tiha intrudusaun kona-ba identidade no papel JSMP nian iha area ka setor justisa, pozisaun JSMP nian kona-ba asuntu indultu, justisa ba krimi grave sira iha tempu pasadu, no pedidu JSMP ba Prezidente atu apoiu setor knaar no funcionamentu organizasaun tribunal sira nian, Prezidente da Repúblika mos reafirma fila fali ninia Política, pozisaun no filosofia kona-ba desizaun ne'ebé nu'udar Prezidente ba kestaun indultu no Política Estado Timor Leste kona-ba justisa ba krimi grave iha pasadu.

* Antes ne'e iha 08 de Outubru 2010 JSMP apresenta ona submisaun kona-ba Kestaun Poder Presidencial ba Indultu ba Ministra de Justisa, Dra. Luçia Maria B. Lobato.

Hanesan ba-bain Prezidente kontinau mantain nia Polítika ba desizaun saida deit mak nia halo nu'udar Prezidente ba nasaun ida ne'e. Tuir Prezidente katak saida mak nia halo ho intensaun atu harii estabilidade, hametin esperitu rekonsiliaun no buka atu halo Polítika ho kakutak no matenek.

Refere espesifikamente kona-ba Polítika no dezisaun indultu nian, Prezidente afirma katak nia halo konsultasaun ho ema hot-hotu no maoria husi representasaun partidu polítiku sira hotu. Desizaun ne'e refleta konvikasaun no filosofia nu'udar Prezidente da Repúblika atu taka pagina ba krimi 2006 no 2008 nian.

Maske nafatin iha diferensia entre JSMP ho Prezidente nia pozisaun polítika, maibe ikus mai Prezidente haktuir katak nia prontu atu vizita JSMP iha loron ruma kuandu JSMP konvida.

Aleinde ne'e, JSMP sente haksolok no kontente teb-tebes atu hetan oportunidade hodi hakbesik no apresenta direktamente pozisaun JSMP nian ba Prezidente da Repúblika.

Tuir planu JSMP sei halo aprosiaman ho orgaun soberania sira hotu atu koalia kona-ba setor justisa no husu atu ema hotu halo esforsu koletiva hodi investe ba setor justisa ida ne'ebé forte atu sai hanesan baze ba governasaun ne'ebé diak iha Timor Leste.

Atu hetan informasaun kle'an, favor kontaktu:

Luis de Oliveira Sampaio

Director ezekutivu JSMP

Email: luis@jsmp.minihub.org

Landline: +670 3323883 ka +670 7295795